

Mario Dijkhoff

ENSEÑANZA MESTER PONE MAS ATENCION NA SU CONTENIDO

ORANJESTAD (AAN) - Riba e tereno di enseñanza tin varios cos cu mester drecha ainda, segun Sr. Mario Dijkhoff ta señala pa DIARIO.

"Nos enseñanza no ta refleha realidad. Nos mester ahusta e sistema di enseñanza mas tanto posibel na e necesidadnan di nos comunidad.

Kico nos comunidad tin mester?

No ta metodo nobo so. No ta school nobo so. No ta computer so. No ta school bunita gevef so, etc. etc.

Loke nos comunidad mester ta school cu ta educa hende cu por biba y participa den un forma positivo den nos comunidad. Pa realiza esaki nos enseñanza mester pone mas atencion na su contenido.

Nos comunidad tin mester di hende cu tin un ofishi. Esaki ta nifica cu tur studainte cu bandona school mester tin un ofishi. Kier meen cu ora bo caba por ehemplo MAVO bo no por bay traha, pasobra bo no tin ofishi. Pa e grupo di estudiante aki lo mester bin curso (teoria y practica) pa prepara nan pa participa den e proceso laboral. Pero esaki no ta suficiente.

Nos comunidad tin mester di hende cu ta mas conciente di e sistema cu nos ta biba aden. Cu sistema mi kier meen; nos custumbenan, norma- y balorman.

No por ta asina cu por ehemplo un estudiante ta caba school y e no sa con pa atende un persona, con pa papia cu respet (p.e na telefon), etc. Pero esaki no ta suficiente.

Nos comunidad tin mester di hende cu ta na haltura di e mundo cu e ta biba aden. Cu e mundo aki mi kier meen: e mundo Arubano, pero tambe e mundo pafo di Aruba. No por ta asina cu un mucha ta caba school y e no conoce number di nos propio matanan y di nos propio bestianan. Un mucha cu ta caba school mester sa algo di pafo di Aruba tambe. Pero esaki no ta suficiente.

Nos comunidad tin mester di hende cu tin habilidad pa comunica. Hende cu por ex-



presa nan ideanan, opinionnan y sentimentonan sin tin mester di pleita cu otro. Di e manera aki nos ta siña conoce otro mihor y nos ta haya mas respet y aprecio pa otro. Di e manera aki tambe e relacion entre e mayornan y e yiunan lo progresa. As-

ina tambe nos lo por sinta conbersa cu mas facilidad tocante diferente topico. Pero esaki no ta suficiente. Nos comunidad mester hende cu sa con pa anda cu cos practico di bida diario, manera; busca number den buki di telefon, yena formu-

lario, busca un lugar uzando mapa, anda cu placa (tambe via banco). Pero esaki no ta suficiente.

Nos comunidad ta un comunidad cu tat desaroya hopi lihe y casi riba tur tereno ya caba ta haci uzo di computer. Ta p'esey nos comunidad mester di hende cu ta bon educa den uzo di computer y su diferente programanan. Esaki ya caba ta un necesidad.

Na school no mester di e computernan so, pero tambe mester siña tocante e uzo di computer den nos comunidad, por ehemplo, den supermercado, na banco, den biblioteca, etc. Si nos schoolnan traha debidamente na e puntanan menciona, e ora nos ta haya hende cu por participa den e proceso laboral, hende cu por produci pa nos comunidad y cu por tin mas satisfaccion den nan trabao y den nan bida diario".